



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

### 36. Kalenderwoche – 31. August 2008

Eduard Sachsenmeyer beleuchtet heute mal die Situation auf dem regionalen Chemnitzer „Heiratsmarkt“ und seine ganz persönlichen Chancen.

## Schangsen

Was bin isch froh, dass isch meine Gudste habb! Nee, werglich! Ooch wennse mir manschma offn Geisd gehn dud - das hamm ja Fraun von Naduhr aus so an sisch! - isch bin drozdähm froh!

Wenn isch se nähmlisch nisch hamm däde, meine Gudste, dann mißde isch misch ja ooch off dähn frein Margd begähm, misch sozusachn feilbiedn, um villeischd irschendwie ma eene abzukrischn. Un eene abkrischn, das dud ja fiehr unsoreen als Mann hier in dähr Geschend immor schwähror wern! Also, isch meene, wennsde als Mann ehm off Fraun schdehn dusd. Fiehr Schwule hingesch, da dun ja hier reschleschd rosische Zeidn anbreschn. Es dud ja immor mähr Männor gähm, die vor Vorzweiflung, weil se keene Frau abkrischn, de Seidn wechsln dun. Von kald off warm.

Nee, de Schwuln hamms guhd. Fiehr die wird das Angebohnd mangels Fraun immor greeßor!

Un die Fraun, die noch nisch abgewandord sinn, die noch offm frein Margd in Gemnidz zu hamm sinn, die wern immor ansbruchsvollor. Klar, die nemm nisch mähr jedn! Die dun sisch de besdn Egsemblahre herausbiggn. Wennsde da schon e bißl Haarausfall hamm dusd odor Bauchansadz odor Drunksuchd... - da hasde keene Schangse mähr!

Die Fraun nemm nur noch absoluhd fählorfrie Diebn. Ährlisch - aussähn mussde wie dähr Schorsch Glohny, Geld mussde hamm wie dähr Abrahamowidsch, in dor Liebe mussde sein wie Gassanofa... nee, ährlisch - isch gloobe, isch däde da iborhaubd keene Schangse mähr hamm. Heeschdens bei eenor, die drodz, dass de Margdlaache so

ginsdisch, keenor will. Nisch fiehr Geld un guhde Worde. Heeschdesn unnor Androhung von Gewalt!

Ja, so eene kennde isch villeischd abkrischn. Wobei nadiehrlich solsche Fraun ooch een gewissn Vordeel hamm. Die kannsde ooch ma irschendwo schdehn lassn un alleene fordloofn. Ja, das is wie mid eim Fahrrad. Wennsde da so een aldn vorrosdedn Drahdese vor dor Koofhall abschedeln dusd, dähn brauchsde nischma anschließn. Da kannsde in allor Ruhe einkoofn, dähr dud noch daschdehn, wensde widdor rauskommsd. Wennsde abor so e schigges Maundnbeik hasd... mid allm Schniggschnagg un achdunzwanzisch Gänge un so... - das meschdesde guhd anschließn, mid eenor diggn Kedde, sonsd kanns ehm bassiern, dass eenor droffschdeischd un dir das Ding klaun dud.

Nee, in dähr Margdsiduadsjohn isses nisch eenfach fiehr unsoreen, mid de Fraun zureschde zu komm. Was bin isch da froh, dasss isch meine Gudste habb!

Naja, un isch habse ja nu schon ibor finfundzwanzisch Jahre. Un dasse mir jedzde noch eenor wegnehm will, gloobsch eischendlich nisch. Odor obsch se doch lieber anschließn söllde, wensch ma alleene in de Kneibe gehn du? Vorsischd is de Muddor dor Borzellahnkiske! Odor villeischd e Geuschheidsgürdl? Nee, da dāde mir meine Gudste abor was husdn!

Isch kann eischendlich werglich bloß hoffn, dasse sisch an misch so geweehnd had, dasse jedzde gahr nisch mergn dud, wasse offm frein Margd bledzlich fiehr Schangsn hamm dāde.

**Eduard Sachsenmeyer**